

# Mess en funcziun ina tuor da vent

## Preparativas per in implont da vent en Val Lumnezia

DA MARTIN CABALZAR

■ Cuort avon ch'ei siari en unviern ha l'interpresa Altaventa installau sia emprema petga per far las examinaziuns necessarias per la realisaziun d'in implont da vent en Val Lumnezia.

El decuors digl atun ha l'interpresa indigena Savoldelli Tanno SA a Vella realisau ils fundaments per installar l'emprema tuor da vent sill'Alp Stavialedra sin intschess dalla vischnaunca da Lumbrein. Da bellezia aura atunila ha l'interpresa Leutner ord igl Allgäu ch'ei specialisada sin la tecnica da petgas e tuors montau enteifer treis gis ina tuor da vent da 60 meters altezia. Las apparatusas da mesiraziun en vegnidas furnidas entras la firma Geo-Net domiciliada a Hannover.

En preschientscha dil president communal da Lumbrein *Giusep Casanova*, dil president dalla Ovra electrica da Lumbrein *Gian Derungs* e differentas autras personalitads han ils responsabels da Altaventa demonstrau dacuort la construcziun ed il menaschi da quella tuor da mesiraziun.

Als apparats da mesiraziun ch'ei piazzai sin 30, 50 e 60 meters han la

funcziun da mesirar la fermezia, la dirrecziun e l'intensidad dils vents. Las datas eruidas cun quei sistem vegnan transferidas directamein el computer dalla interpresa Geo-Net a Hannover per saver far las analisas necessarias. Damai



Uatga a caschun dall'installaziun dalla tuor da mesiraziun: il canzlist communal *Giusep Capeder*, *Wolfgang Zelzer* da Altaventa, il president communal *Giusep Casanova*, il meinafatschenta da Altaventa *Andy Imfeld* ed il parsura dalla Ovra electrica da Lumbrein *Gian Derungs* (da sen.).

MAD

che las frequenzas da vent muntan igl unviern a rodund 70 pertschien e la stad a 30 pertschien quent'ins saver eruir gia quest unviern datas concretas sco basa per l'ulteriura planisaziun. Ils cuosts per las mesiraziuns previdas ein calculai cun rodund 250 000 francs e vegnan surpri entramein entras l'interpresa Altaventa.

Suenter ch'ins ha analisau ils resultats da quellas empremas mesiraziuns vegn decidiu schebein ins sto far igl onn proxim ulteriuras mesiraziuns secundaras. Parallelmein vegn la Altaventa era a sclarir tgei pass preparatorics che ein aunc necessaris per la realisaziun d'in emprem implont da vent da pilot silla spunda lumneziana.

Actualmei ei ins lundervi d'installar ina «meisa rodonda». Participai a quella ein las vischnauncas, il cantun, la regiun, las organizaziuns digl ambient, las corporaziuns d'alp e l'ovra electrica. L'emprema runda da discussiun ei previda proximamein. Sco quei che *Andy Imfeld*, il gestiunari da Altaventa, ha sincerau enviars La Quotidiana ei el cunsciens e perschadius che in project da tala dimensiun sa vegnir realisau mo en cooperaziun cun tut ils pertuccai.